

嘉慶松江府志

松江府志卷四十

名宦傳

春申流浦遺澤千秋山松築城沒而猶祀若顧陸著  
姓其先或爲吳令或爲婁令子孫遂家此閒其風流  
尤可想也惟歲遷時貿湮沒或多且

代遺愛無碑報功祠廢事業所播採綴爲難論次前  
賢能免漏略之誚耶志名宦

吳

伍員字子胥楚人也父奢爲楚平王太子建傅以讒殺員  
亡之宋奔鄭又奔吳吳楚柏舉之戰楚將囊瓦敗走吳

王入郢員鞭平王墓三百後以直諫賜死府治南四十里胥浦塘相傳子胥所鑿自長泖東接界涇會惠高彭港處士瀝濱諸水北流又東北折注吳松江以入海漢唐以來建廟祀之

史記參方輿紀要

楚

黃歇楚人也爲楚相封春申君賜淮北地十二縣後十五歲請獻淮北地爲郡而封於江東考烈王許之春申君因城故吳墟以自爲都邑治水松江導流入海今黃浦是也因其姓以名之亦曰春申浦

陳志

漢

李君更始五年爲守治東倉爲婁縣屋

陳志

越紀書云爲屬縣屋陳志引曰婁縣不知何據又更始僅有三年日五年似謬姑蘇志云東倉古婁縣惠安鄉則陳說必有本也

### 三國吳

顧雍字元歎吳郡吳人州郡表薦弱冠爲合肥長後轉任婁令有治迹爲會稽丞行太守事數年入爲左司馬累遷大理奉常領尚書令封陽遂鄉侯黃初四年改爲太常進封醴陵侯代孫邵爲丞相平尚書事赤烏六年卒

三國志

### 晉

虞潭字思奧會稽餘姚人吳騎都尉翻之孫也以軍功賜  
爵都亭侯晉爵東鄉侯遷宗正卿領會稽太守徵拜尚  
書出爲吳興太守晉爵零陵縣侯蘇峻反加督三吳晉  
陵宣城義興五郡軍事峻平詔轉鎮東將軍吳國內史  
復徙會稽內史未發還復吳郡晉爵武昌縣侯是時軍  
荒之後百姓饑饉死亡塗地潭表出倉米賑救之又修  
滬瀆壘以防海鈔咸康中進衛將軍更拜右光祿大夫  
開府儀同三司卒於位追贈左光祿大夫謚曰孝烈晉書  
袁山松陳郡陽夏人瑯琊太守方平子少負才名博學有  
文章著後漢書百篇襟情秀遠善音樂爲吳郡太守孫

恩亂山松守滬濱城城陷被害其將李祥收松尸葬焉

書晉

吳郡記晉陸安四年吳國內史袁山松築滬濱壘備孫恩五年恩自海鹽陷滬濱殺山松方輿紀要前涼城注府東三十五里有袁崧城東晉袁崧築以備孫恩一名築耶城按崧卽山松

宋

祖沖之字文遠范陽蒟人也稽古有機思宋孝武使直華林學省解褐南徐州從事公府參軍始元嘉中用何承天所製厯比古十一家爲密沖之以爲尙疏乃更造新法表上之孝武令朝士善厯者難之不能屈會帝崩不施行厯仕爲婁縣令謁者僕射入齊轉長水校尉領本

職永元二年卒著易老莊義釋論語孝經注九章造綴

述數十篇

南史

梁

陸慶吳郡人少好學徧通五經尤明春秋左氏傳節操甚高釋褐梁武陵王國右常侍歷征西墨曹行參軍除婁令陳天嘉初徵爲通直散騎侍郎不就永陽王爲吳郡太守欲與相見辭以疾時宗人榮爲郡五官掾慶嘗詣焉王乃微服往穿壁觀之謂榮曰陸慶風神凝峻嚴君平鄭子真何以尙茲鄱陽王晉安王俱以記室徵竝不

就

陳書參南史

陳

殷不佞字季卿不害弟陳郡長平人也少立名節以至孝  
稱好讀書尤長吏術仕梁爲尚書中兵郎承聖初遷武  
康令時兵荒饑饉百姓流移不佞循撫招集襁負而至  
者以千數陳高祖受禪起戎昭將軍除婁令宣帝卽位  
爲軍師始興王諮議參軍兼尚書左丞加通直散騎常  
侍卒於官

南史

隋

何之元瀟人好學有才思袁節尹丹陽辟爲五官掾尋除  
信義令之元宗人敬容位通顯相顧訪之元終不一造



或問之對曰德薄位隆覆敗可待吾懼及禍耳識者稱  
歎大建中歷湘州刺史始興王叔陵諮議參軍及叔陵  
誅之元屏絕人事著梁典三千卷

陳志

唐

趙居貞彭城人天寶九載由揚州長史遷吳郡太守以嘉

興海鹽地廣奏并割崑山置華亭縣

太平寰宇記

蘇籀攝華亭令在官簡惠泣事公正

晏公類要

齊抗字遐舉自解經三遷至殿中侍御史俄拜諫議大夫

與當局者不合出爲處州刺史復刺蘇州蘇寶劇郡轄

吳縣華亭諸邑大田多稼浮濫冒沒吏禁或弛占著名

數戶版不均抗乃閱其生齒書其比要強家大猾不得

蓋藏介特單輕與之紓息諸邑頌其公平焉

陳志

包某延陵人初辟秀才德宗時爲縣令闢田野增戶口均

賦愛民顧況嘗記其廳事壁

顧志

陳志作包何當以其延陵人與顧況同時華志包何字幼正查何係吳興人包融子官起居舍人幼正何弟刑部侍郎借之字也今仍闕俟考

張聿瑯琊人令華亭肅綱紀民吏有犯書罪繇於籍許以自新再犯則勘籍按論名定命錄府吏有所需則榜邑門曰府以某事下縣索某物期某日民感其誠供輸無敢後指爲赤心榜嘗有猾儒以干乞爲業入其界聞歌

曰華亭君子來及幾時老稚免疾苦遠近無渴飢安得九重天子知曰此政安可撓哉遂抵他境

顧志參王沂公清異錄

宋

劉惟一天禧初知華亭縣時學舍介於梵刹惟一始相地於縣治東南遷焉陳執古有遷學記

郭志

葉清臣字道卿長洲人天聖二年進士以策擢高等自清臣始授太常奉禮郎集賢校理通判太平知秀州景祐四年同修起居注直史館請外爲兩浙轉運副使太湖有民田豪右據上游水不得泄清臣建議疏盤龍滙滬瀆港入於海民賴其利又數上書論天下事陳九議十

要五利皆當世可行者有文集一百六十卷

宋史參東都事略

錢貽範彭城人慶厯間知華亭縣歲旱頻仍貽範講求利

病瘠願會浦盤龍塘諸水以時蓄泄章峴爲之記

南畿志

吳及字幾道靜海人皇祐間知華亭縣時旱蝗及禱於橫

山之神既得雨蝗亦避境至秋大稔乃教民預修水利

以待淫潦明年大水而阡陌堅完溝洫通利復稔如初

比三年家給人足及去父老攀留不得進至空一邑隨

之後四十餘年民不能忘及嘗築環碧亭西湖上後令

劉鵬因改曰思吳從民志也

顧志參妻志

宋史本傳無知華亭縣事東都事蹟宋史新編並云  
年七十以進士起家新編作十七或傳寫之誤通志

以爲本宋史本傳殆未深考

沈遘字獻達錢塘人翰林學士遘之弟幼挺拔不羣長而好學讀左氏班固書模仿之輒似因兄任監壽州酒稅熙寧初爲審官西院主簿初受知王安石及安石當國更張新法遘與論事不合罷去久之以太常奉禮郎監杭州軍資庫轉運使攝華亭縣他使者有夙憾思中以文法會縣民忿爭相牽告辭語連及奪官流永州更赦徙池州築室齊山上名曰雲巢杜門隱几爲文章雄奇峭麗尤長於歌詩曾鞏蘇軾黃庭堅皆與倡酬往來竟不復仕

宋史

李餘慶字昌宗連江人起家應天府法曹參軍知湖州歸安縣後通判秀州州近鹽場餘慶作華亭海鹽二監俾業鹽者歲入常絹以杜私販又爲石堤自平望至吳江五十里以除水患

浙江通志

李夔字斯和其先無錫人唐末徙邵武家焉元豐三年進士調秀州華亭尉轉奉議郎除江淮荆浙六路制置發運司勾當公事不赴改授僉書平江軍節度推官嘗攝郡事承累政因循之後繫獄者衆夔命吏分條所犯不日皆決遣之終龍圖閣待制子綱生華亭官舍高宗時爲名相贈少師諡文定

顧志參宋史

郭三益字慎求海鹽人家義興璩之子也元祐三年進士  
爲常熟丞常平使者調蘇湖常秀四州之人濬青龍江  
分地程役三益所部前期告辦使者留之俾助他邑不  
如期者三益卽引所部歸使者怒檄追甚急其母周氏  
謂三益曰青龍之役連數郡其分地程役賦廩食宜皆  
已上聞今我先畢何名復役之使者倘再思行且悔矣  
雖然汝不可無會第無以所部從也三益如教已而使  
檄止丞勿來事亦遂已

郭志

劉鵬彭城人元祐四年知華亭縣下車卽修庠序立教誠  
簿書期會各有條理不數月一境大治縣齋東弦歌堂

三山亭民閤皆鵬所建

南畿志

江西通志云鵬字時舉瑞金人元豐二年進士知華亭縣有政聲其籍貫登科年代與南畿志不符未知孰是

毛漸字止仲江山人舉進士紹聖中爲兩浙轉運副使浙部水溢詔賜緡錢二百萬以賑之漸言數州被害卽捐二百萬儻仍歲如之將何以繼乃按錢氏有國時故事起長安堰至鹽官徹清水浦入於海開無錫蓮蓉湖武進廟堂港疏常熟涇梅里入大江又開崑山七耳茜涇下張諸浦東北道吳江開大盈顧滙柘湖下金山小官浦以入海自是水不爲患歷進直龍圖閣知渭州命下



卒優贈龍圖閣待制

宋史

徐確字居易莆田人陳洪進辟掌書記確首勸洪進納土  
洪進怒欲害之走京師試禮部第四歷宗正丞提舉兩  
浙常平時大水歲饑確考禹貢三江故道得吳松古江  
由太湖東注入海吳松出其下易湮塞請濶封家渡至  
大通港直徹海口計地七十四里役徒二百二十餘萬  
以常平錢米十八萬充和雇諸費水道復通

上海志

毛滂字澤民江山人夙有文譽蘇軾薦之政和間知秀州

風雅和惠有東堂集載松江雜詠金山寒穴泉銘

郭志

姚舜明字廷輝嵊縣人政和間知華亭縣以元豐元符斷

獄制書揭之獄府治西偏葺琴堂爲聽政之所宣和初改知崑山欽宗朝爲御史僞楚之際挺節不污南渡後官戶部侍郎卒贈太師

顧志

王珏字德全臨川人安石孫紹興二年起家鹽官丞行縣事秀州歲以錢給亭民煮鹽積十五年不給計十九萬七千餘緡民訴於朝除珏提舉浙西茶鹽逾年盡償且羸鉅萬開華亭瀕海河二百餘里鹽得流通田資灌漑經界法行妨民者三百六十餘事其七千二百餘戶尤病珏奏除之兼提點刑獄未閱月平反大辟重而輕者三人死而生者五人移河南提舉官至直敷文閣太府

少卿卒於橫山私第

郭志參浙江通志

龔相字聖任歷陽人元祐黨人兵部侍郎原之孫紹興間知華亭縣甚著聲績後家吳中子頤正著中興忠義錄續釋常譚行於世

顧志參中吳紀聞

劉穎字公實衢州西安人紹興二十七年進士由溧陽主簿知鉛山縣移知常熟簽判潭州用王佐薦召監進奏院進太常丞遷兵部郎官提舉浙西常平茶鹽疏澱山湖以洩吳松江禁民侵築毋使逼塞大流民田賴之以寶謨閣直學士致仕卒年七十八贈光祿大夫

宋史

黃瑀字德操閩縣人紹興八年進士初爲饒州司戶參軍

歷官兩浙轉運司幹辦公事權華亭縣歲凶瑀白常平使者發廩以賑使者以當俟奏報難之瑀曰民命在旦夕苟可生之雖重得罪不悔退卽發粟賑給全活者萬計吏部侍郎汪應辰等交章薦除御史臺檢法官旋擢監察御史子杲登進士

鳳志

顏師魯字幾聖漳州龍溪人紹興中進士歷國子丞除江東提舉改使浙西役法敝甚細民至以雞豚嬰楊折產力遇役輒破家師魯下教屬邑豫正流水籍稽其役之序寬期會免代輸咸便安之鹽課歲百鉅萬本錢久不給亭竈私鬻禁不可止刑辟日繁師魯擲帑緡盡償宿

負戒官吏毋侵移視旁路課獨最高宗謂執政曰儒生能辦事如此予職直祕閣入爲監察御史終龍圖閣直

學士知泉州

宋史

劉俛字碩翁總角日誦千言爲文操筆立成登紹興三十年進士改秩知華亭邑版賦窄率貸諸豪民豪民撓政前令少善去俛謁臺府願寬假三月乃治酒政損關征不三月課入自倍逋賦以償剖決若神豪猾皆斂手並海有秦山鹽鐵蚌港三堰不治被旨督作早夜露處灌田六萬畝守以圖奏孝宗大悅亟加褒賞繕華亭海堰禁邏兵胥吏擾沿海民船事皆施行改知岳州有異政

民生祀之

郭志參通志

李適字叔周監秀州華亭稅又監秀州酒被檄視潦舟行民田中所至有監司圭田官吏不敢以潦聞適曰永潦爲患上供且應復況圭田乎盡復其租常平使者聞而奇之又復視經界躬行田畝高下定賦悉得其均士民

德之

宋史

楊樛年字茂良丹徒人初監行在草料場以京秩薦秩滿班見改知秀州華亭縣華亭賦重歲饑民不堪命乃盡蠲賦入之無藝者以私帑代輸提點刑獄司檄繫平民十餘爲強盜廉得其情卽釋之吏請須報公曰民以盜

繫少稽則生理蕩矣吾寧以故縱獲戾毋使吾民之及此也境多黃雀醢之以媚貴要歲且百萬乃下令嚴采捕之禁他如修學以養士開河以利農爲梁以濟涉每縣計不足則以俸入繼之代期未盡一月使者撫細故論罷邑人寃之御史陳賈諫議大夫謝諤交章訟其事有旨擢通判揚州終朝議大夫

郭志

孫峴字舉善以詞學擢第官中書舍人淳熙初爲浙西提舉以措置支還亭戶本錢及增賣鹽帑興修水利有功除直敷文閣兩浙轉運判官

顧志

羅點字春伯撫州崇仁人六歲能文淳熙三年擢進士第

二繇校書郎除浙西提舉規畫荒政凡數十奏躬行畝  
畝實惠甚博先是崑山華亭之間有澱山湖洩諸水道  
戚里豪彊之家占以爲田水繇是壅點廉得其實奏請  
開濬且爲圖以獻上從其言百姓勇於赴功不日而畢  
所濟田百萬畝點孝友端介不爲矯激或謂天下事非  
才不辦點曰當論其心心苟不正才雖過人何足取也  
官至簽書樞密院事卒贈太保諡文恭

顧志參  
宋史

姜詵隆興中爲兩浙轉運副使浙西水溢民大飢詵相地  
便宜卽張涇堰旁增庫爲高築月河置閘其上復浚河  
自箬山達青龍江口二十七里許克昌作記刻石頌之



顧志

章岵字伯望爲兩浙轉運使有威名會暴風起湖海湧沸  
民居瀕湖海者如海鹽華亭吳江多遭漂溺岵遣吏所  
在巡視振恤蠲田租民不失所改知蘇州

陳志

邱密字宗卿江陰軍人隆興元年進士第三人除國子博  
士乾道中丞相虞允文薦其才遷太常博士知秀州時  
華亭捍海堰廢鹹潮歲入壞竝海田蘇湖皆被其害密  
奏創築三月堰成蘇湖秀三州斥鹵復爲良田除直祕  
閣知平江改兩浙轉運副使累官同知樞密院事卒諡

忠定

宋史

徐誼字子宜温州人乾道八年進士累官太常丞知徽州移提舉浙西常平嘗論水利之切於時者曰昔下流不疏而水上溢故鑿直曲港還三江故道開宜興百瀆所以順導下流也惟高原曲徑乃豬堰之爾昔之言水利如單鍰郊廛皆是也今開吳淞江下流與宜興百瀆屬之海者無論數十百所異時浦港磬折以趨海今近浦之民多取徑直疏決蘇湖常秀舊爲澤國比年雨或後至種且不入蓋圍田衆而疏導多也小人見利不顧其害圍於淺水旣爲高田圍於菱蕩旣爲稻田二俱不已復有下腳始之重陂大半爲平始之良田背水自曬十

日不雨農廢業作然且承用舊說又將疏之失利害之實矣故舊田溝澮當濬治圍田下腳無輒開已開未填當捺合今之言水利者能行是三說則高原舊田還爲衍沃而農不病矣入爲吏部郎守右司郎中寧宗朝權工部侍郎知臨江府責惠州團練副使移袁州婺州提舉崇道觀知建康府隆興府卒諡忠文

顧志參宋史

林藏字子禮吳人舉進士乾道中爲浙東提舉常平五年

知秀州所至有善政華亭諸屬縣賴以安撫

郭志

汪文振字子泉休寧人淳熙進士由黃州教授除司農少卿直寶謨閣提點浙西刑獄時旱蝗民飢縣督逋操切

文振錄囚至華亭得四百餘人盡釋之約秋成償所貸檄諸縣亦如之民困以甦請老直煥章閣主管冲佑觀

陳志

詹體仁字元善建寧浦城人少有異材鄉舉第一弱冠第進士歷泉州晉江丞宰相梁克家薦爲太學錄歷遷太常丞攝金部郎中光宗卽位提舉浙西常平務爲民除害興利謂浙右之有漕渠非止通饋運資國信往來而已蘇秀常潤田之高仰者實賴之於是開漕渠濬練湖置斗門爲旱潦備又以餘力立舉子倉創安濟院所活甚衆散鹽本錢數萬紓華亭之力歲終課利增羨除戶

部員外郎終太常卿體仁常言居官涖民盡心平心而已盡心則無愧平心則無偏世服其確論云

顧志參宋史

徐民瞻西安人慶元間知華亭縣訪問疾苦表章先賢購國子監書以惠鄉學爲堂於學之東廡繪陸氏機雲像俎豆其中顏其額曰二俊并序其集授之梓又以錢參

政良臣專力建學新其祠宇爲文記之

郭志

錢闇字子言溧陽人嘉泰二年知華亭縣縣舊有僧子韶學田一千八百九十三畝爲豪民侵占請於守鍾必萬復之因以修治學宮一時榱桷煥然林至爲之記

顧志

趙彥啟字彥和嘉定中監青龍鎮稅重建鎮學百里中弦

歌相聞兵部侍郎杜孝嚴以彥啟有官不顯有民不多而所知者本所務者大特爲文以記之

顧志

楊瑾字延潤餘姚人紹定五年監華亭稅明年嘉興守趙與嘗辟置幕下掌抄撩田園事詭匿盡露旋攝華亭蠲胥吏白納錢寬民戶積欠弛酒稅無藝之征吏民大悅請於朝遂使卽眞於是修經界立義役遷廟學凡前令所不能辦者處之沛然有餘遷平江別駕後登清要祀

先賢祠

顧志參通志

黃黼字子耕分寧人廷堅從孫嘗從朱子學朱子深期之而黼亦以道自任舉太學進士知華亭縣多政績創製

錦堂通判處州復除台州謝良佐子孫居台者播越流落營收而教之著有復齋集

宋史

孫子秀字元實餘姚人紹定五年進士爲吳縣主簿焚妖人冰仙太保廬沈其人於太湖日詣學宮與諸生討論義理開慶初累遷浙西提舉常平先是丞相丁大全以私人爲之奪亭民鹽本錢充獻羨不足則佔籍虛攤一路擾動子秀還前政鹽本錢五千餘萬貫奏省華亭茶鹽分司官定衡量之非法多取者徙浙西提點刑獄員暑周行郡縣獄爲之清度宗卽位進太常少卿尋知臨安府以言罷起婺州卒

宋史

姚憲字令則以父舜明任補海鹽丞後知秀州土豪錢安國舍匿亡命爲姦盜憲擒置之法州里得安華亭大水民飢憲請輸粟萬斛以賑朝廷賜書獎諭除提舉浙西常平累官參知政事

郭志

施退翁山陰人淳祐閒知華亭縣以風化爲己任興學校建講堂創齋廬以教學者七月告成不擾民華文閣直

學士王遂記其事

郭志參南畿志

董楷字克正天台人以通經入仕咸淳中提舉松江市舶分司上海愛民養士號稱循吏津梁廨宇亦多建置去

官日民遮臥道上不忍其去

顧志



黃震字東發慶元府慈谿人寶祐四年進士調吳縣尉府檄攝其縣及常州華亭皆有聲在華亭請罷茶鹽分司及論鹽場利害尤悉又以華亭水鄉大究塞泄之法申府論修田墜萬民賴之提舉常平王華甫辟主管帳司文字時知平江朱熠常州錢庚孫嘉興吳君擢皆倚嬖倖厲民華甫病革強起劾罷三人震贊之也後通判廣德軍紹興府知撫州皆有政績終浙東提舉常平居官恒未明視事事至立剖自奉儉薄人有急難周之不少吝所著日鈔百卷卒門人私謚文潔先生

郭志

孟文龍字震翁鄒國亞聖裔哲宗昭慈后五世從孫以世

賞補將仕郎試授迪功郎監華亭船場調兩浙西路安撫司時賈似道枋國百僚悉隳法守文龍守職不少回丞相章鑑樞密趙順孫交薦上不報咸淳間被命主昭慈祀事元兵壓吳境與守臣議不合反哭昭慈廟平章史弼等列薦起之以死辭晚年著易解大全其學得之臨邛高斯得門人稱潛心先生子潼字宗鎮舉茂才由教授歷官松江府判官致仕嘗就故居建鄒國公祠創性善家塾教族黨子弟焉

顧志

元

呂謙字和之亳人從丞相伯顏南征所至不殺謙實贊之

宋平東南大饑諸省白狀發賑活民數萬拜懷遠大將軍鎮上海當春勸農召父老謂之曰善牧羊者先去敗羣善治民者先除民病由是里胥畏憚境內肅然

顯志參上

海志

沙全哈刺魯氏世居沙漠從太祖平金戍河南柳泉家焉五歲爲宋軍所虜留劉整幕中統二年整以瀘州歸元全與之俱授管軍百戶陞千戶至元十二年從丞相阿朮攻克常州乘勝下沿海諸城至華亭戒士卒毋殺掠以功授華亭軍民達嚕噶齊有未附鹽徒數萬掠華亭全擊破之籍其名得六千人請於行省屯田於淮之芍

陂行省以民新附時有反側欲屠其城全以縣士衛謙  
言鹽卒多非土人屠之枉死者衆敢以死保遂止加武  
略將軍兼領鹽場尋陞華亭爲府改全爲松江萬戶府  
達嚕噶齊專領軍政二十二年移隆興請復舊名抄兒  
赤未幾以松江瀕海重地復命鎮之卒於官

郭志參  
元史

高仁字壽之少以材推擇爲吏歷官江浙行中書省左右  
司員外郎數奉省檄行旁近郡縣以松江東鄉水利久  
廢田不宜稻請去故所賦米而用土產菽粟代其輸民  
便之

郭志

劉宣字伯宣太原人自幼喜讀書有經世志宣撫張德輝

薦爲中書省掾至元十二年以行省郎中從丞相伯顏  
平章阿木統軍平江南除知松江府同知浙西宣慰司  
事在官五年威惠並著三遷入爲禮部尙書轉吏部二  
十五年繇集賢學士除行臺御史中丞江浙行省丞相  
忙古臺悍戾縱恣常慮臺臣糾其罪而尤忌宣誣以阻  
壞錢糧朝廷遣官鞫問宣就逮書後事緘付從子自誠  
有身爲臺臣義不受辱語自剄舟中延祐四年贈資善  
大夫御史中丞上護軍追封彭城公諡忠憲

元史

趙知章字伯常睢陽人以淮西道廉訪副使遷同知兩浙  
都轉鹽運使司至元閒兩浙鹽稅計引四萬寢至四十

八萬松江十萬有奇民大困知章分司松江以廉律已  
諭富者出財貧者傭力財力相資課以大集亭田歲有  
科糧爲請於行省留以活亭民之飢者萬四千一百一  
十二人

郭志

燕珪建昌人以廢知松江府有政聲趙孟頫程鉅夫交章  
薦之除大司農領八道勸農營田司務事按行郡縣興  
利除弊遷湖廣行省右丞

陳志參江西通志

王楠至元十四年爲上海市船司提控每歲招集船商於  
番邦博易珠翠香貨等物次年回帆依例抽解然後聽  
其貨賣時有客船自泉福販土物來者所徵與番貨等

楠以爲言於是定雙抽單抽之制雙抽者番貨也單抽

者土貨也

元史食貨志

僕散翰文字行之至元十九年知松江府奏析華亭東北五鄉爲上海縣以府直隸中書行省愛民如子秩滿歸民擁道嗟涕翰文亦爲泣下代者張之翰謂曰公得民情而不忍舍何不再留三年翰文曰願我公他日如翰文之去耳

願志

張之翰字周卿邯鄲人至元末以翰林侍講學士知松江府有古循吏風民苦荒租額計十萬之翰偕達嚙嚙齊麻台馬力陳其弊於行省奏除之新府治建西湖書院

著述甚富有西巖集三十卷卒於官

顧志

徹理燕只吉臺氏六歲而孤母蒲察君教之讀書六經二氏悉涉原委以故聰明開益才略兼人恒以匡君經國自期從世祖征東北積勲拜榮祿大夫平章政事大德初除江南諸道行御史大夫教化宣明七年改浙省平章政事其治如在臺門無私謁京師轉粟多資東南居天下十之六七而松江填淤歲久富民利之當水出塗築爲圍田瀾漫漫灌民不可稻徹理發卒數萬濬決隄石隄之導水入海使復其故身自董役經時而成民得良田若干萬頃九年召入平章中書贊右丞相薨年四



十七蓋棺日楮緡不滿二百而債券積多至十萬大臣

清貧無與倫比贈徐國公諡忠肅

元文類

石從愿大德閒以翰林知松江府明斷無冤民代去兒童

連袂歌好知府云

通志

季祿兒至大閒知松江府性廉貞有豪民懷金贄見者送

爲官物人稱曰眞清太守尋丁內艱哀號擗踊一夕頭

爲白喪除乞終身廬墓朝廷奪情起爲嘉興路治中

顧志

焦榮青城人初知武康縣歷知松江府事平役法修水田

復義倉善政不可殫述趙孟頫爲撰神道碑頗詳之

山東志

通志

顧陳郭三志知府題  
名表皆不載今補

申杲字良輔真定人皇慶元年知松江府以忠信仁厚爲  
治隨事悉心百廢修舉未滿考召同簽崇祥院濟南張  
養浩爲撰去思碑載其事從子秉禮字彥魯元統元年  
知府事亦有善政士民刻石頌德謂之棠蔭碑

陳志

張如砥字周道歷城人延祐元年繇洛陽移知上海縣潔  
己愛民有民爭寺僧租適嬰兒病死陷僧索租毆斃如  
砥曰不毆爾而毆嬰兒詐也叱使去三年秋浙西大水  
壞禾稼行省檄縣徵賦如常如砥力爭得減明年春大  
饑復白於省發粟賑卹以清惠聞擢陝西行臺監察御

史

郭志參  
通志

張國英字世傑延祐七年知華亭縣時郡將陵轍有司其  
蒼頭廬兒日游街曲詭浪譏訶民婦弗敢避國英以法  
繩之民藉以安與李廷傑西漢傑稱三傑云

顧志參  
通志

俞鎮字伯貞崇德人受學鄧文原通五經尤邃於易延祐  
間鄉舉第一除華亭教諭

一作授

歷典湖廣江西江浙文

衡官至建德路知事郡士得其指授者悉爲閩人榜其  
居曰學易門人稱爲學易先生著有修詞稿二十二卷

嘉興  
府志

鄧巨川字百川真定人至治初爲上海丞縣境瀕海穀不

宜稻農惟樹藝豆麥而有司徵收概科秬米有力者轉  
糴以輸貧則破產流徙責里正代償巨川知其弊上其  
議於行省請易米以豆麥從土宜紓民困未幾遷行省  
掾史力陳民瘼上官爲之惻然使銜命上中書巨川昌  
言於政事堂拳拳以民命爲請乃下地官議命以泰定  
二年始聽以豆麥準著爲令仕至禮部尙書

楊翼昌記

汪從善字國良婺源人父斌徽國公從善以典瑞監丞陞  
宣德知府丁徽國憂服闋除知松江府兼勸農事仍提  
調普慶寺錢糧松江濱海統華亭上海二縣厥田下下  
而賦上上春夏水溢田不受種藝秋潦穀且不實從善

飭縣築隄防水親授方略城西南有晉陸瑀魚池舊屋  
其上爲鄉師授書地歲久且壞從善新之更名西湖書  
塾設掌祠置祭田招師弟廩膳之秩滿徵國夫人不樂  
他徙卜居城南以承親意泰定元年丞相奏知南康府  
母薨還居松江以著書自晦有通鑑地理志二十卷考  
異六卷生意齋筆錄三十五卷書記十卷中朝紀聞若

千卷博愛堂家藏方論若干卷

陳志參  
職術集

俞師魯字唯道婺源人大德十年辟署史館編修親老乞  
外除隆興路學教授至治中除廣德路學教授遷松江  
府知事有政績民爲之歌曰俞公未來案牘分投吏饒

而欺俞公既來官僚怡怡吏飽而嬉惟其黑幘使我心

惻陳志

密蘭色目人泰定二年自山南江北道肅政廉訪使爲都水庸田使置司華亭每赴司騶從甚簡一日導市中有扈廁者荷擔突簾出馬驚蘭墮地騶阜掖憩民家保伍方譟縻其人待罪蘭起坐曰吾馬生非其故也慎勿責之時服其量後召爲刑部尙書顧志

何蒙字叔正泰定閒尹上海貧而能廉家奴十餘口屑麥作粥以食無愠歎聲歲歉請發粟賑貸民賴以全上海志

俞貞字復卿寧州人泰定丁卯鄉貢授上海丞調知棗陽

縣皆有政聲後至元六年召拜翰林修撰與修遼金宋

三史

陳志參修  
南昌志

劉克復字仁叔燕山入元統元年繇并州幕選授松江推官始下車博徒繫者七人其三人爲怨家所搆昭雪之府稱神明居益久平反大辟至流徙者十有二屈抑而伸者三十有八疑而請輕者七完其生者甚衆先是豪民曹夢炎賂取大官歲獻萬石久之產盡糧移買家連及鄉邑權倖又於常賦外椎斲羨餘民無所愬克復言於當路悉除之

郭志

郭也先不花字彥禎內邱人後至元二年爲華亭尹民

以僞鈔告償其物價者郭曰偶誤耳付之火易真鈔償之及改官民羅拜馬首爭抱持脫其鞶懸東郭門以存遺愛歷袁州路判官致仕慨然曰華亭禽魚草木不吾怪也遂寓跡二十載卒葬縣之橫雲山

郭志參  
婁志

李璋鉅野人自江浙闖掾擢上海尹留意文教嘗重刻九經四書版藏文廟以廣傳習學者便之

郭志

顧遜字思邈至正十七年爲松江同知時值苗軍亂後羣情未固遜至固捍守申化條撫循安集四境寧謐俗更阜成論者方之張全義之尹河南郭禹之治荆韓建之刺華化瘠爲腴轉嗟爲歌庶幾無愧又謂其學明經知



大義故爲政有本末以積勞遷嘉興路同知

顧志

劉輝字文大汴人早歷臺省雋聲流聞至正五年以餘姚丞擢知上海縣縣瀕海岸湖旱潦皆病重以朱季公田虛徵及罪人資產稅額加數倍役人往往破產輝諭富民令自實隱田勸豪右出粟爲義役常平本達官里居者亦各來助於是賦役遂均恒先期告集瀕海民有三甲五甲者挺暴有司莫敢詰輝取痛懲之撫其孱弱而諭以禮義衆遂帖服邑無社學創置百六十餘所舉鄉約召耆民及小吏觀之使知敬老尊賢之義威行惠浹期會惟揭縣門無敢後者有兄弟爭財連歲不決輝召

諭之皆感泣罷去擢中書戶部主事會母卒民不忍舍  
爲買地以葬之兩甲民亦相率哭奠鄰邑士民亦爲刻

石頌德

郭志參  
上海志

吳福孫字子善杭州人未冠用察舉召見奎章閣補嘉興  
路儒學錄遷上海主簿到官日歲大旱有禱立應理豪  
強所據民田久而不歸者與婚姻之訟積歲不決者興  
利除害次第修舉奉省檄詣溫台給鹽場工本七年秋  
執事鄉闈復馳傳督閩中稅賦以疾還上海卒於廨

參上  
海志

張德昭字彥明邢臺人至正七年尹華亭首箋陳仙居勸

學文鏤板授縣子弟歲澇都水使者勒有秋狀德昭固  
爭至投所授敕求去使者悟許之先是吏吳中者受大  
家贄如圭田之入德昭悉謝絕衣麤食淡妻子化之秩  
滿士民爲八字頌刻之郭門曰公平廉明勤儉慈讓楊

維禎有遺愛碑記

郭志參  
婁志

哈散沙字允中阿兒溫氏至正十一年監松江府達嚕噶  
齊時兵興民苦徭役沙抑強植弱以均之鈔法不行民  
苦無糴沙謂僚吏曰吾爲民師帥忍坐視老弱餒死溝  
壑乎吾將糴倉粟以賑民秋穫糴以補之吾職塞矣衆  
皆曰唯命遂發粟并勸富民月糴官置半印簿帖籍其

口與糴數簿給糴家帖給糴者逐月對帖糴之卒無閉  
糴憂視事五年廉愼爲浙西最尋移監平江路張士誠  
兵起城陷赴水死

顧志

鄭銖字彥平浦江人其家八世共爨號爲義門至正中任  
松江等處稻田提領所大使嘉定華亭上海之交有田  
二十餘頃旣隸所中而都水使者及江淮財賦府復重  
賦之民困甚銖爲聞於朝免之先是徵民無藝歲有羨  
糧萬餘斛上下其利之銖至卽命還民吏以無主名爲  
解弗聽乃計家口數分給之稻田所素稱米穀府銖日  
糴於市猶糴人然會從子洵來省覲病卒卽解印綬去

郭志

蘇宗瑞至正二十三年尹上海敏練明決海賈舟膠漁者  
剽其貨事覺無以坐株連買貨者宗瑞片言決之循古  
制置文廟禮器籩豆鼗爵琴瑟鐘鼓之屬莫不備具識  
者嘉其知所先務錢南爲紀德政碑

上海志

王良字止善諸暨人尙氣節讀書務明理不苟事言說淮  
東廉訪司辟爲書吏尋授廬州錄事判官調建德尹除  
兩浙都轉運鹽使司經歷議計口食鹽不便請減或謂  
成籍不可改良曰今民食寡賦多死徙已衆顧重改籍  
而輕棄民命乎遷兩浙行省檢校官松江人徐璿潘文

桂告曹夢炎等占種湖田草地及瞿時學等隱匿沙塗  
事行省委良體覆良詳考本末謂松江一府在宋止納  
秋苗十一萬二千有奇今已至七十四萬五千餘石沿  
海諸場歲辦鹽課鈔三十八萬五千九十五定除支撥  
工本外實解三十二萬三千七百定有奇其于國計非  
小補矣湖田塗蕩糧課俱已入官縱有微末未科然計  
其所收爲利已大璫等所言蓋如販夫鬻婦校計錙銖  
豈知爲國之體不宜信從以長無窮之害議上行省從  
之良有文學嘗與段天祐追和華亭十詠後宦至淮東

宣慰副使卒

元史參浙  
江通志

松江府志

卷四十一

三

王至和樂安人至正閒知松江府興學校重農事考釋奠禮製執事者冠服刻栽桑圖以教民嘗歲饑盡發常平粟復勸富人出粟鈔振卹之凡活飢民二十五萬口有奇禮部尙書于文傳有記顧志參通志

胡存道

穀耕錄作胡善

字師善諸暨人泰定閒舉人至正十六年

爲松江儒學官苗兵入城縱火大掠存道獨守學舍不去寇怒殺之廟得免於災死之前一日題其壁曰銜命來分教臨危要致身但圖存聖象不愧作儒臣明正統中祀於先賢祠元史類編

何緝字子敬泰州人至正末尹上海縣廉公識大體建明

倫堂及東西二齋遇淫祠巫覡必毀斥之曰毋使鬼神

禍福之說惑吾民也

郭志參上海志

魯淵字道源建德人以進士爲華亭丞動循禮法佐治公廉以道學自任郡之治春秋學者多出其門稱岐山先生所著有春秋節傳圖例策府樞要

郭志

盛彥忠廣陵人元季爲華亭丞嘗開白茅河水道通利嘉興貝瓊作白茅歌贈之楊維禎比之古鄴令西門豹云

郭志

劉福郭太俱吉水人福仕松江路同知太爲巡檢元末寇起福以奉議統兵爲宣慰周冕策援郭太設伏東向寇



分隊出冕擊之太乘勝追擊獲其渠帥斬首數百級日  
曠寇尾襲冕軍太又斃其先鋒福奮勇擊殺矢盡失援

俱死之

江西通志

松江府志卷四十終

松江府志四十一

名宦傳

明

湯和字鼎臣濠人幼有奇志從太祖定天下論功封中山侯進封信國公乞身賜鈔治第中都既倭寇上海帝顧謂和曰卿雖老強爲朕一行和請與方鳴謙俱鳴謙國珍從子習海事和乃度地浙西東竝海設衛所城五十有九選丁壯三萬五千人築之盡發州縣錢及籍罪人貲給役民不能無擾或謂和曰民謫矣奈何和曰成遠算者不惜近怨任大事者不顧細謹踰年城成稽軍次

定考格立賞令民四丁以上者戶取一人戍之得五萬  
八千七百餘人嘉靖閒東南苦倭患而金山衛青村所  
南漕所立墩堡遇警舉烽首尾策應其功永賴焉卒年  
七十追封東甌王諡襄武

明史參  
陳志

仇成封安慶侯洪武十九年奉敕築金山衛城規畫創置

胥自成始

從信  
錄

祝挺字正夫鄱陽人洪武初知上海縣時盜錢鶴臯倡亂  
僞總兵姚某率衆偪縣治挺懷印走府謀討逆聞府城  
陷乃仰天嘆曰縣我死所也效死弗去賊迫使見僞總  
兵挺毅然曰吾有頭在勿復語賊知不可屈釋之乃密

遣人諭巨室以順逆有能擒賊者上汝功巨室遂具舟  
泊器械渡挺而東與前主簿鄭著王倚主簿李從吉等  
聚義兵斬僞帥姚總兵金萬戶于西溝復縣治餘黨東  
奔海謀復叛又遣唐翼等追斬之時右相國徐達遣偏  
帥統兵破錢鶴臯將移兵縣境挺星馳詣帥曰苟降罰  
罰我如撫民民則定矣無煩大軍三往返猶未止會鶴  
臯忿邑人不附者指爲逆黨帥逮捕甚急且以窘挺挺  
潛使報狀于右相國徐達達爲上聞按問得實乃釋時  
鄰邑以誑誤死者相枕籍而上海獨晏然挺之力也楊

維禎爲文刻石紀其事

江西通志

馮榮烏江人洪武初知華亭縣錢鶴臯據府叛榮被執不屈縛置獄中亂定總兵葛俊怒從亂者欲盡殺之榮力爭得止脫死者數萬戶

南畿志

李從吉靈石人少負奇概通兵略洪武初爲上海主簿錢鶴臯倡亂劫知縣祝挺從吉奉挺密謀一鼓平之從吉死妻劉營葬於縣西原二女耐焉

上海志

陳寧初名亮茶陵人元末爲鎮江小吏從軍至金陵代諸將言事明太祖異之賜名寧授江南行省掾史厯中書省參議吳元年出知廣德州遷浙江按察使洪武元年召入爲司農卿遷兵部尙書二年出知松江府政尙嚴

明積賦竝集尋召爲尙書左丞

明史胡惟庸傳

李浩字師孟保定人歸附初同知府事均賦役平出納明黜陟慎興革嚴關津清獄訟時稱爲循吏未幾召置機

近

郭志

王文貞洪武六年以府同知署上海縣事時兵後教弛文貞修復學校築射圃建觀德堂舉行鄉射禮又時臨講堂訓勉諸生郡邑被其化焉

上海志

通志郭志皆列華亭上海新志  
據顧誠學校記改歸上海從之

蔣惠鄱陽人洪武十一年知華亭縣先是縣誣平民李秀三等三十人爲盜惠察其無辜立質之乃密授方略獲

真盜馬胡等十八人正其罪

通志

胡儼字若思南昌人資性朴諒問學該博凡天文地理律  
厯醫卜皆通其說洪武二十年舉于鄉授華亭教諭時  
年尙少抗師道訓勵諸生敦行檢爲講說經史寒暑不  
廢丁母憂去官服闋改長垣上疏乞近地養親改餘千  
建文元年知桐城縣永樂初授翰林檢討歷侍讀諭德  
國子祭酒兼侍講掌翰林院事洪熙元年以疾乞休加  
太子賓客致仕祀郡先賢祠

明史

蕭九萬南昌人洪武閒以歲貢爲諸暨丞博學能詞翰嘗  
書容忍思慮四字疏其義揭門屏閒以誨訟者遷華亭

知縣疏民弊五事忤旨被逮臨刑齧指血錄詩報母云

微臣斬首丹心在尙有英魂返故鄉

通志

施之和福州人洪武閒下沙場副使轄一團至九團課繁

路遙心恤竈隱憂勞積疾卒於官

南淮志

杜鎰洪武末知上海縣其政以崇節儉黜華靡爲本廉介

自信遇事明果吏畏而民懷之

顧志

甄庸北平人建文元年以戶部主事出爲松江知府醇謹

嚴重以廉自防雖所得俸貲苟欲易一衣具一食必于

他郡營之常曰人非古人其避嫌疑不得不爾也事母

至孝仕至工部尙書致仕

畿輔通志參郭志



周繼瑜松江同知燕師渡江瑜募兵勤王不克械至京磔於市乾隆四十年

予諡烈愍

欽定  
諸臣錄

夏原吉字維喆湘陰人洪武二十三年鄉舉授戶部主事  
歷本部右侍郎充福建采訪使永樂二年蘇松大水以  
戶部尙書奉命來治旣而上命僉都御史俞士吉齎水  
利集賜之原吉乃集官屬吏民及凡諳曉水利之人博  
求參考以浙西諸郡蘇松最居下流三江故道久湮難  
可驟復而嘉定劉家港卽古婁江徑通大海常熟白茅  
港徑入大江宜濬吳松江安亭諸浦引太湖水入劉家

白茅二港使直注江海而松江大黃浦乃通吳松要道  
下流壅塞旁有范家浜至南踰浦口可徑入海宜濬令  
深廣上承大黃浦以達泖湖之水此卽三江入海之故  
跡條奏以聞

疏見水利中

上從之役夫十餘萬原吉布衣徒

步徧歷遐僻日夜經畫盛暑揮蓋去曰衆皆赤體曝日  
中我何忍于是人爭盡力水患乃息歲饑奏發粟三十  
餘萬石以賑之二年還朝復出治水水洩農田大利時  
有奏以水退淤肥召民耕種以足國用者原吉曰民疲  
極矣可加之重役乎卽馳奏得寢姚廣孝還自浙西上  
詢之對曰夏原吉古之遺愛也三年秋八月召還掌部

事洪熙初進少保兼太子太傅卒贈特進光祿大夫太

師諡忠靖

明史

黃子威名輅以字行進賢人洪武末以儒士授長洲丞永樂初擢刑部員外郎二年出知府事公勤剛果不惑愾邪始至郡罹水患子威跋履鄉邑撫綏賑賚民藉以存活者甚衆三年政通人和上下信服以註誤及丁母憂去民前後赴愬懇留者千餘人其後郡更三守而民念之猶一日朝廷知之俾復任操履如初甚得時譽

江西通志

魏驥字仲房蕭山人永樂三年舉于鄉明年授松江府學

訓導汲汲以成就人材爲務諸生讀書學宮常夜攜茶

粥勞問諸生益感激自奮滿九載諸生楊珙等詣闕乞  
留時仁宗監國令還任復教三年十七年陞南京太常  
博士正統中累官南京吏部尚書景泰元年致仕成化  
七年卒年九十八謚文靖驥身不勝衣言不出口居家  
二十年布袍糲食不治生產清德雅望爲海內宗而尤  
得松人士心旣老猶手書往復不倦松人雖長子孫猶

曰吾祖吾父魏公門人也

明史

劉懋金山衛指揮僉事倜儻有才永樂十四年倭亂城陷  
同官皆當論死懋疏言軍士差往各路采取營木及清  
勾逃亡老弱賊衆兵寡帝命覆查事實竝得免死復職

金山

衛志

陳遜字必恭浦城人永樂十二年進士擢監察御史巡按吳中上海民濮宗文聚無賴行劫官軍不能制密以方略授守禦官擒之無一免者復捕蘇松諸民唐全等千餘人民賴以安仕至雲南右布政卒于官囊無遺貨都督沐昂爲具棺斂還其鄉

郭志

韓陽字伯陽山陰人永樂十六年以鄉舉授松江府學訓導操行清謹善教迪三載以父憂去再教丹陽薦爲監察御史陞湖廣僉事督學政終廣東左布政使

顧志

侯端字敬莊盱眙人永樂四年授金山衛指揮同知性嚴

毅剛勇以金山東南要害修城濠整器械練士卒爲戰  
守備十七年倭寇登岸端與同知衛事卻清分兵出戰  
清出南門軍覆賊入南門斷橋端軍東門不得入引兵  
至西門橋亦斷仰天歎曰城亡與亡何倫生爲遂策馬  
躍過濠衆不能繼與賊巷戰身被箭如蝟轉戰至衛門  
賊驚曰好將軍也以所掠布橫於街欲生致之端劍挑  
而截之會僉事施義兵至曰吾事濟矣乃同次於楊家  
橋鳴鼓招散卒得百人令曰今潮退舟膠人持草束輦  
礮至海灘焚其船賊不得歸遂大敗端有勇力府治石  
後貌高四五尺一手挽之行十餘步策馬過坊闕交手

攀楫兩股夾馬而懸之巷戰時一劍墮地所乘馬口銜

以授允爲奇異云

郭志參金山衛志

魏允韶江西人永樂二十二年進士歷四川道監察御史  
宣德二年戶部言江南歲賦百萬轉輸領運未得其人  
廷臣以允韶對遂命督漕比至值歲潦允韶撫諭諄切  
歲終輸者六七卽乘傳詣闕爲民請命帝允其奏

郭志

方佐寧波人宣德初知上海縣明達世務清白愛民民亦

愛之

上海志

潘俊字文英清河人宣德中以鄉貢授松江通判清慎慈  
祥才能理劇賦役有弗均者周知其數而均齊之秩滿

民欲借留會病卒於官

郭志

陳瑄字彥純合肥人少從大將軍幕以射雁見稱屢從征有功建文末遷右軍都督僉事永樂元年封平江伯充總兵官總督海運瑄言嘉定瀕海江流衝會海舟停泊無高山大陵可依請於青浦築土山方百尺高三十餘丈立堠表識既會通河成罷海運命瑄督漕運洪熙六年乞於蘇松諸郡撥糧與附近衛所官軍運載至京量給耗米及道里費軍民交便帝命尙書黃福等議行之更民運爲兌運自此始也八年卒於官追封平江侯贈

太保謚恭襄

明史



周忱字恂如吉水人永樂二年進士由庶吉士授刑部主事轉員外郎遷越府長史洪熙五年以天下財賦多不理而江南爲甚思得才力重臣往釐之用大學士楊榮薦遷忱工部右侍郎巡撫江南始至召父老問逋稅故皆言豪戶不加耗并徵之細民民貧逃亡而稅額缺忱乃創平米法令出耗必均又請頒鐵斛下諸縣準式革糧長之大入小出者令縣於水次置囤囤設糧頭囤戶各一人名轄收至六七萬石立糧長一人名總收民持帖赴囤官爲監納糧長但奉期會而已置撥運綱運二簿撥運記支撥起運之數及運通諸倉耗綱運填注制

淺諸費羨餘貯倉曰餘米次年餘多則加六徵又次年  
加五徵故時公侯祿米軍官月俸皆支於南戶部蘇松  
民轉輸南京者石加費六斗忱奏令各府支給船價米  
一斗所餘五斗通計米四十萬石有奇并官鈔所糴共  
得米七十萬餘石置濟農倉貯之振貸之外綱運風漂  
盜奪皆借給於此秋成抵數還官修圩築岸濬河支口  
糧不責償耕者借貸必驗力田多寡給之秋糧竝賦姦  
頑不償者不復給定爲條約尋敕兼理松江鹽政華亭  
上海二縣逋課至三十六萬餘引竈丁逃亡忱謂田賦  
宜養農夫鹽課宜養竈丁上便宜四事節竈戶運耗得

米三萬二千餘石倣濟農倉法置贍鹽倉補逃亡缺額  
鹽課大殖上海沿江生茂草多淤流忱乃濬其上流使  
崑山顧浦諸水迅駛下壅盡滌忱久任江南與吏民相  
習若家人父子每行村落屏去騶從與農夫餉婦從容  
問所疾苦商榷處置其馭下雖卑官冗吏開心訪納務  
盡其長匹馬往來見者幾忘其爲巡撫也進戶部尙書  
改工部帝命李敏代之敕無輕易忱法然自是戶部括  
所積餘米爲公費儲備蕭然其後吳大饑道殣相望課  
逋如故民益思忱不已景泰四年卒謚文襄

明史

趙豫字定素安肅人燕王起兵下保定豫以諸生督賦守

城永樂五年授泌陽主簿未上擢兵部主事歷郎中宣德五年簡廷臣九人爲知府豫得松江時衛軍恣橫豫執其尤者杖而配之邊衆帖然擇良家子謹厚者爲吏訓以禮法均徭節費減吏員十之五巡撫周忱有所建置必與豫議清軍御史李立專務益軍鉤及姻戚同姓酷刑榜掠愬枉者至千餘人鹽司鉤竈丁亦累及他戶豫乃上章極論之咸獲蘇息有詔減蘇松官田重租豫所轄華亭上海二縣減去十之二三正統中九載考績民五千餘人列狀乞留巡按御史以聞命增二秩十年大計羣吏舉治行尤著者十一人豫列上等賜宴及襲

衣遣還在職十五年清靜如一日方豫始至患民俗多訟訟者至輒好言諭之曰明日來衆皆笑之有松江太守明日來之謠及訟者踰宿忿漸平或被勸阻多止不

訟

明史

王源字啟澤龍巖人永樂二年進士授庶吉士改知深澤縣數上書論事被詔徵入都又論時政得失忤旨下吏會赦復官奏免逋負歲饑坐發粟賑救被逮民爭先輸納得贖還召爲春坊司直郎遷衛府紀善出爲松江同知奏捐重額積逋六十萬餘石民有宋保等五人號五虎源繩以法又廉得褚路等所誣二百餘家悉平反之

以母老乞歸養服闋起刑部郎中正統初擇廷臣十一人爲知府源得潮州進階二品年七十致仕

明史參郭志

王琚山西平陽人宣德八年以長史左遷知華亭縣莅政

廉平人心悅服致仕去民擁抱留其鞵相顧不忍別

郭志

王來字元之慈谿人宣德二年以鄉貢授新建教諭召爲監察御史巡按蘇松時中官陳武以太皇太后旨路經江南勢張甚獨爲來所折及還懇之上問都御史顧佐蘇松巡按爲誰佐曰王來命記之及代還臨軒慰勞賜宴光祿以寵異之除山西參政巡撫于謙嘗薦以自代

郭志

趙祥字景得永平人永樂中父亮爲金山衛百戶祥年十四被倭掠國王知爲中土人召侍左右改名元貴遂仕其國然心未嘗一日忘中土也宣德中諷王入貢與使者偕來上疏乞賜歸侍養時方懷柔遠人不從其請但許給驛暫歸母不能識曰果我兒耳陰有痣驗之信未幾還日本宣帝意仍令入貢祥復申前請許留襲職祥博覽經史通左氏春秋善吟詠年八十餘以壽終

明史參金

山衛志

李瀚屯留人宣德閒進士繇潼關移知華亭縣歲凶民多流亡加意招撫漸以復業清還貴戚所侵民田徵拜御

史厯副都御史董漕政南京戶部尙書

郭志

孫鼎字宜鉉廬陵人永樂三年舉人授江浦教諭宣德九年陞松江府教授以德義陶煦士類重建尊經閣祀漢陸康陸績元胡存道於先賢祠葺廟廡廣學舍經史禮器靡不整飭在郡九年考順天鄉試者二廣東者一所至服其公明正統八年楊溥薦爲監察御史代彭勛董南畿學政以身爲教如在松江時置本源錄錄諸生善行行部不令人知每單車泣所部諸生來謁輒閉門試之卽日定甲乙揭通衢請託無所用庚午英宗北狩鼎試畢謂諸生曰故事當簪花宴今臣子枕戈之秋不敢



陷諸君於不義設茗飲步送諸門旣而詣闕上書請隨  
所用以效死不報還遇尙書金濂慷慨論事有萬里丹  
心扶日月兩人清淚對山河句未幾以親老致仕知府  
張瑄言鼎孝追會閔學繼程朱宜起居論思之職不允  
天順元年卒於家人稱爲貞孝先生

明史彭勛  
傳參郭志

李敬字成學郡人永樂十五年舉人宣德閒疏請祿養授  
上海訓導父有疾迎入署菽水承歡者十餘載遷德化

教諭改崇德皆以師範稱

上海志

章增字永益瑞安人正統閒繇永新移知華亭縣禮賢惠

民退食則閉門廨宇蕭然六年秩滿以疾終

郭志

黃琛字廷獻延平人正統四年進士授戶部主事尙書金  
濂以琛耿介有爲檄清理蘇松糧儲蘇松自周忱巡撫  
後所在積儲有餘粟凡有興作輒從取給豪猾因爲姦  
利琛至稽覈欺隱宿弊頓蠲仕至南京戶部右侍郎郭志  
彭勛永豐人以建寧府學教授拜監察御史正統二年始  
奉敕提調南直隸學校其取人先行而後藝校文先理  
而後詞風裁凜然士習丕變七年松江小試府學取十  
五人華亭取七人或以爲少請益之不許曰吾所取者  
皆決科若是足矣及榜出兩學薦名二十人錢溥第一  
徐觀第三張恭第五所遺者縣學二人耳其精鑒如此

後陞考功郎中山東按察副使致仕

明史參郭志

張楨東臯人正統二年以上海丞擢本縣知縣先是巡撫

周忱行部上海耆民相率詣忱言楨公清勤敏撫字有

方縣繁劇非楨不能理今縣闕員請以楨補忱具以聞

吏部以楨未九載例不當遷英宗曰民情不可拂也特

從之

明史循吏吳履傳參郭志

劉琚字宗正臨桂人宣德七年舉人授松江推官爲政清

恕治具畢張薦授監察御史巡視京畿權貴閹豎望風

斂跡鎮守大臣爲大書桂林秋月柏府春風以贈之

廣西

通志

陳師輿字東魯莆田人舉人正統四年金山衛始設學校以師輿爲訓導諸生率皆武弁軍戍子弟師輿樂四書五經十七史諸略及兵家七子直說俾傳習之習尙一

變

金山衛志

翁世資字資輔莆田人正統六年領鄉薦明年舉進士十年授戶部主事進郎中勘南畿水災奏蠲糧米七十餘萬發粟賑貧全活甚衆陞工部侍郎天順四年歲祲蘇松歲造綺幣通貢甚多世資奏乞免忤旨貶衡州知府後遷江西左布政使終工部尙書

明史楊鼎傳參郭志

翁紹宗字繼武鳳陽人正統七年授都指揮使奉敕總督

衛事景泰中以捕盜功陞都督僉事時沿海營堡年久傾圯紹宗奏撥蘇松嘉三府夫丁修築獨樹胡家江門等堡加甃甃石內設廨宇營屋歲調官軍防禦海道肅清子熊世襲指揮使性耿介城垣公署廢墮悉爲修舉

金山  
衛志

劉惠字孟懷上蔡人以薦授金山衛指揮使掌衛印三十年獨居南樓清心勵行一衛化之知廉恥之足尙子英

嗣職有父風

郭志參金  
山衛志

王勝字子奇羽林衛人正統二年與劉惠竝受豐城侯薦同知衛事數年孝以率人廉以律己崇良善黜姦惡習

俗一變遷福建都司嘗巡海遇颶風歎曰吾無風波風  
波其奈我何風隨息以壽終

金山  
衛志

葉冕字拱辰上虞人正統十年進士授南京刑部主事景  
泰二年擢知松江府廉明公恕民畏愛之歲屢不登冕  
悉力賑救賴以全活者甚衆郡有澱山湖其半屬崑山  
界湖堤壞相率推諉冕視爲一體築隄萬丈餘崑山人  
感愧陞山東參政累遷右副都御史致仕

浙江  
通志

楊昕瑞安人景泰三年知上海縣興學勸農平徭簡訟以  
母憂去賻贈皆不受起知華亭清操益勵移壽光卒於  
官喪還過吳門士民多往哭奠

上海  
志

陳泰字吉亨光澤人鄉試第一除安慶府學訓導權監察御史三爲巡按景泰元年以右僉都御史參劉安軍務尋命督治河道七年移撫蘇松蘇松賦額不均泰令民田五升者倍徵官田重者無增耗賦均而額不虧天順改元遷廣東副使進右副都御史總督漕運謝政歸

明史

本傳參  
李秉傳

繻來學字時敏麻城人宣德八年進士授戶部主事景泰六年以副都御史巡撫江南時吳中水旱頻仍來學請以今歲額輸米三十萬石已徵者悉貸貧民來秋償官帝從之又言蘇松等郡糧米向俱軍兌輸京頃因邊警

調軍征守令民自輸至歲役民十五萬加盤費銀三十萬兩米四十萬石正糧數少而浮用數多民以重困今邊境寧謐請仍令軍運上可其奏著爲令

郭志參通志

因禮曲沃人景泰庚午舉人爲松江教諭純篤不阿居官有師範郡人錢福輩奉爲經師先是禮爲武功清澗禹城訓導最後至松江故錢博贊詞有持三十年之教鐸

布四學宮之陽春云

山西通志

甯祥章邱人景泰中以鄉貢授松江府同知莅職清謹濬蒲匯塘建盤龍塘橋歲旱奏免糧十九萬石

郭志

李紋字仲繡九江人舉賢良方正景泰中知上海縣剛毅



練達姦黠不敢肆嘗以暇日訪民疾苦而陰察其貧富

故徭役稱平雖荒村僻巷若家至而戶歷者

上海志

趙正閩縣人景泰間爲上海教諭終日坐堂上講授夜振

鐸以警惰者及門感其誠念之不衰云

郭志

李秉字執中曹縣人正統元年進士授延平推官徵入歷  
戶部主事督餉宣府兼理巡撫提督軍務天順初改督  
江南糧儲初陳泰均蘇松賦額秉至守其法出官庫銀  
充運費易倉米以賑饑黜賊吏以安良生舉知府違例  
被逮帝以過細宥之巡撫大同薦擢右副都御史轉左  
加太子少保吏部尙書以讒去位宏治二年卒贈太子

太保諡襄敏

明史參  
郭志

徐貫字原一淳安人天順元年進士宏治七年蘇松大水  
廷議推貫奉敕以工部左侍郎往治主事祝萃副之貫  
至委知府史簡濬吳江長橋太湖及吳松江通判郝希  
賢濬吳松江白茅港七浦塘鹽鐵塘沈涇水患遂弭進  
尚書加太子少保卒贈太保諡康懿

郭志

崔恭字克讓廣宗人正統元年進士天順二年以左副都  
御史巡撫江南時米價騰踊恭出倉米給民而取其直  
以充義役費米價遂平吳松江湮塞八十年恭督工開  
濬萬餘丈下流遂通又濬曹家溝蒲匯塘新涇大盈浦

諸水至今爲利民因目曹家溝爲都臺浦召爲吏部左

侍郎陞尙書卒贈太子少保諡莊敏

明史

江震錢塘人天順四年以鄉貢授上海訓導勤于訓課兩

司文柄稱得人擢知廣濟縣

上海志

劉孜字顯孜萬安人正統十年進士授監察御史歷遷山東左布政使天順五年以右副都御史巡撫江南十府蘇松財賦自周忱立法後代者多紛更孜訪忱遺蹟斟酌行之民稱便松江有廢沒官田千餘頃責輸賦甚苦之孜請召民佃種以田肥瘠定稅輕重蕪萊盡闢召拜

南京刑部尙書致仕

明史參通志

俞欽新昌人景泰二年進士禮部郎中天順七年坐科場失火左遷松江同知廉慎慈惠嘗董學校理戎伍士勸民懷入爲兵部郎中去之日行李蕭然終禮部右侍郎

郭志

吳則宣平人天順八年以巡檢平賊功遷華亭主簿明察善斷巡撫滕昭委署上海縣清負租一萬八千石設策賑飢民八千餘戶海溢爲災復請蠲租六千餘石士民德之作借賢育民詩

郭志

滕昭開封人成化六年以副都御史考察福建尋奉敕巡撫江南時上海官吏貪黷昭往按之悉置諸法列郡震

陳減秋糧加耗益漕運費甚得軍民心

郭志

王崇之字守節滑縣人天順八年進士成化七年知上海縣時濬吳松江崇之分董其役有條理滑縣志以爲崇之天性友愛剛正不撓與王威寧越齊名云

上海志

戴珊字廷珍浮梁人天順八年進士成化八年以監察御史督學南畿能以文藝占人心術器識及年命修短品秩高下十不失一經其賞拔者後多知名厯遷福建左右布政使宏治二年以王恕薦擢右副都御史累進南京刑部尚書左都御史卒贈太子太保諡恭簡

明史參郭志

婁謙字克讓上饒人成化二年進士擢監察御史十四年

繼戴珊督學南畿顏其堂曰畏天軌範端肅中官汪直  
新幸銜謙不與通使偵伺其短竟莫能得終四川布政

使

郭志

何滯字源清東莞人成化八年進士授松江推官明允清  
慎門無私謁知府王衡贈詩云關門共惜寒儒苦斷獄

爭誇老吏明徵拜監察御史終按察僉事

郭志

于準字世衡安仁人以鄉貢入太學通判長沙衛輝二府  
成化十年陞松江同知攝府事吏牘有上下其手者諭  
令改之必當而後已民有犯面告以所坐有枉者爲直  
之吏不得取一錢被檄潛孟瀆河能盡衆力不啻一人

而事辦城中失火勢烈甚華衣冠向火再拜火隨息秩滿擢知府乞致仕俾還任仍莅事三日去準爲吳與弼高第弟子爲政清約慈惠蓋學有原本焉

廣志

陳選字士賢臨海人天順四年會元成化中以監察御史提學南畿頒冠祭禮鄉射儀俾諸生習之每按部就止學宮弦歌俎豆古風郁然前後三年變色之語不及于衿佩折箠之笞不下于阜輿仕終廣東左布政使革市舶忤中貴誣逮卒正德中贈光祿卿諡恭愍

通志參郭志

司馬璽字通伯會稽人天分超絕年十五作廬山賦出語驚人成化八年舉進士擢監察御史提學南畿校文隨

閱隨定飛筆點竄俄頃而畢瑕瑜不遺與諸生講論從容往復每舉一義必出人意表士以此服之陞福建按察副使致仕卒

郭志

郭綸字理之長壽人成化十一年進士知望江縣調華亭爲人明察而嚴整未明出廳事逮暮始休雖盛暑必衣冠終日無怠民一見卽識其姓名縣庭清肅諸吏行文書外無敢出一語者時中貴人至從人多需索綸按其驛券視無名者叱左右收縛之中貴人皇恐謝過去自是豪強屏跡民賴以安二十一年以疾告歸

通志

申綱陽曲人工詩文景泰癸酉舉人選監察御史有直聲



出按河間等處姦貪屏迹歷知松江九江兩郡家無厚  
產有舊屬劉宇嘗餽以金峻卻之後宇爲冢宰寓書臺  
使者月餽錢米卻不受

山西通志

王衡字宗銓稷山人少以神童稱天順八年進士知淳安  
縣召爲監察御史成化十四年知松江府方正清嚴人  
不敢干以私止息囂訟非死囚未嘗繫獄囹圄數空民  
運至瓜洲淮安交兌者苦官軍摧剝有司不敢言衡奏  
其弊請就支于本倉且劾總兵官不戢軍士奉旨約束  
一二運皆停中貴人以織造至多所需索衡以法裁之皆  
斂手不敢肆興學校重經術賓禮賢俊諸生見者與之

均禮在官七年清介如一日丁內艱去府舍一物以上  
皆命吏藏弄以待繼者卽醯醬亦然累官至陝西布政

使

山西通志

李榮字從質任邱人成化十四年進士繇教諭知上海縣  
政尙寬恕徭役聽民自議而無弗均期約舒緩而輸將  
恐後葺學宮及養濟院禁火葬拓義冢瀕浦渡者苦焚  
索又以舟小易致覆溺榮市堅木造巨艦設官夫駕之  
姦民詐爲孟御史繫諸獄以憂去官縣人祀之

上海志

都勝字廷美金山衛都指揮僉事成化九年奉敕備倭處  
事整暇著有勞績創興義學以教武臣子弟及伍符尺

籍之秀者改廣東都指揮僉事卒於官

金山衛志

郭鉉字彥和合肥人以武舉授金山衛都指揮僉事成化十五年奉敕備倭旋擢都指揮同知凡城樓塞堡整飭有緒尤崇禮教文廟禮樂一時鼎新在官七載以清謹

著聞

金山志

王恕字宗貫三原人正統十三年進士成化十五年以兵部尙書巡撫南直隸諸屬吏聞恕名墨者輒解綬去十八年松江水災大饑斗米百錢恕奏免秋糧數十萬草半之周行賑貸全活至二百餘萬日中貴人王敬挾千戶王臣等以妖術取中旨收市圖籍珍玩張皇聲勢搜

括貴人財寶官府供億不貲恕盡列其罪狀三劾奏之下敬錦衣獄而梟王臣于江南遠近稱快終吏部尙書

諡端毅

明史

徐憲字振綱安陽人成化十四年進士授松江府推官察獄無冤民大悅服有盜牛者以火刀更其角莫辨也憲令縱牛之野牛奔主家闌中乃治盜罪入爲監察御史以親老謝病歸

郭志

樊瑩字廷璧常山人天順八年進士授監察御史成化二十年繼王衡知府事時運夫折閱逋欠積累而倉場書手尤侵盜害人瑩至日夜講求盡得其要領曰運之折

閭以衆皆齊民無所統一故利歸狡猾害及善良而糧  
運綱費與供應軍需皆出自餘米旣收復糶輾轉重煩  
此弊所由生也乃請革民夫俾糧長自運寬其綱用以  
資之夏秋稅糧除常運本色外其餘應變易者盡徵白  
銀見數支遣運糧者旣無敢輕費掌記者又無可蔽藏  
于是官司積弊十去八九田野之閒叫呶始息會丁母  
憂去宏治中累官刑部尙書致仕卒贈太子少保諡清

簡

明史

彭韶字鳳儀莆田人天順元年進士授刑部主事轉員外  
郎中三遷廣東左布政使二十年擢右副都御史巡撫

江南奏折兩京文武俸糧省轉輸之費召爲刑部右侍郎嘉興百戶陳輔緣盜販爲亂遣韶巡視韶至賊已滅乃命兼僉都御史整理鹽法商人苦抑配韶爲定折價額蠲宿負憫竈戶煎辦徵賠折閱之困繪八圖以獻又條利病六事悉允行還朝改吏部進刑部尙書乞休卒贈太子少保諡惠安

明史參  
郭志

汪宣字德卿江陵人成化二十二年以進士知華亭縣華亭自郭綸去後時咸謂難繼宣通練明察庭無留事興學校禮師儒獎勸人材衆翫然稱之擢監察御史巡按南直隸以親老乞南京就養卒

通志參  
郭志

段讓字克恭洪洞人成化中以舉人署華亭教諭性淳厚待諸生有恩敦尚廉恥口未嘗言利知府王衡其鄉人也尤重之秩滿未發有以人命事繫府者懷金託緩其獄讓曰此何以及我且彼死者何辜謝而遣之

鄒志山西通志

劉璟字德輝鄆陵人成化十一年進士二十二年以刑部郎中出知松江府敦士習勸農桑修水利勢豪殺人前守莫能治璟置之法剗姦植良歲積賑儲宏治七年以憂去有城隍威靈太守廉明之謠累遷至太子少保刑部尚書璟性剛直不阿上官誣以墨掾史周禪挺身出白之事載禪傳

鄒志參河南通志

傅鼎字用養閩縣人宏治二年鄉試第一授華亭教諭經學邃密尤長於易嘗聘爲江西考官郡守子就試投以盒啟封乃四豬蹠也鼎堅卻之亦不舉其子陞龍川知縣忤權貴左遷婺源丞改吉安卒著有易髓八卷華峯

集射禮圖

郭志

劉琬字德資宜春人成化十四年進士由松陽移知上海縣奏請以餘糧編銀雇夫積官稅羨餘葺學舍發姦摘伏不謝勞勩擢南京監察御史宏治十二年出知松江府凡所興革務爲久長新陸宣公周文襄祠表揚節孝崇尚儉約風俗一變厯階至副都御史琬本姓高子祉



舉人疏請復姓

上海志

金洪字惟深鄞縣人成化二十三年進士授靖江知縣改  
吳江擢監察御史巡按陝西山東裁抑閹宦劉瑾不能  
堪揭其名於壁欲擯之邊郡而吏部持之出知松江府  
洪減官布價諸庫閹不得賂詭言布惡械至京以案牘  
明晰不能害

郭志

郝希賢聊城人成化四年舉人宏治初授松江通判疏導  
有方擢同知佐政益最

郭志

西賢盱眙人授金山指揮使築江門獨樹等營堡軍伍嚴  
整子寧字孟清襲職修建營房以居民卒貯薪易銀以

應公需掌印十餘年獄無冤濫告訐不與兵部會推福  
建汀漳守備署都指揮僉事奉敕總督揚州等處備倭  
授都指揮僉事致仕卒

金山志  
參衛志

董鏞字啟之鄞縣人宏治六年知上海縣縣分東西鄉高  
者利濬卑者利防而防爲艱鏞請築西鄉田圍捍水患  
都御史吳世光賢之令吏吳者皆以上海爲式修撰錢  
福爲之記

郭志

朱瑄字廷璧鄞縣人成化五年進士宏治八年以右副都  
御史巡撫南直隸出帑糴穀萬斛備賑蘇松歲旱瑄禱  
雨輒應已復大濬民艱食奏減常額疏三江殺水勢濬

孟濱諸河通漕運又請省蘇松常杭嘉湖六府賦稅寬民力民皆頌德焉

郭志

郭經字載道廬龍人宏治九年進士十一年知上海縣事簡民安縣有黨惡爲民患經執而殺之以不能阿上官被誣士民爲之愬得白移開封同知陳肅撰碑以頌其

德

上海志

張偉定襄人宏治戊午舉人授山東濟南府推官陞順天府通判九載考績擢松江府同知卻歲例數千金民間有使君如水清之謠

山西通志

原應宿陽城人宏治閒以舉人授松江通判攝上海縣事

剛達明果敏於幹事其董水利尤力濬湮鑿隘大裨農

畝而公不匱財民不見病

郭志

王鑑之字明仲紹興人宏治初督學南畿校士先德行而後文藝有在三等籍者文雖工必黜士習肅然遷大理

丞歷官至刑部尙書

金山衛志

陳琳字玉柔莆田人由庶吉士授監察御史宏治十四年督學南畿按部校閱衡鑒至當被斥者寡怨言舉古鄉射禮以言事忤劉瑾左遷揭陽丞南都士大夫傾城出送至有追餞錢塘江澣依依不忍舍者後歷知府轉山

東提學副使

金山衛志

王憲字肅之徐州衛指揮使宏治十七年奉敕擢金山衛都指揮僉事修輯偉幹志充其材建置龍亭儀仗文廟祭器繕治城隍及督造五堡營屋訓練將士悉有規畫

遷中都留守司

金山衛志

陳祥字應和高安人宏治十五年進士授上虞縣正德二年移知華亭守己廉潔遇事詳慎稱賢令召爲監察御史歷巡撫應天右副都御史

郭志

徐潭字惟靜定海人宏治六年進士正德二年知上海縣區長有歲例輸官斥弗受歲禮設法賑濟存活無算先是訟者苦遣卒婪索潭造木人付訟者持至所訴之家

令其人抱以自詣無敢後邑豪逋官租區長往往破家以償潭巖懲之以此殖怨會督儲者有所求不與中傷之改知湘潭累遷按察副使

上海志

馮裕字伯順臨朐人正德二年進士授華亭縣執法不少借郡長吏有出劉瑾門者大肆斂括不之應也縣大水田多淹沒賦無所出請移於高鄉或譁言裕加賦郡長吏從中搆之巡撫下裕獄而民聲其冤改知蕭縣去方待理時寓鶴城書院歲餘至朝夕不給裕賦詩自得無幾微不平意人以爲難

華亭志

陳威字民望臨川人由進士擢監察御史正德五年出知

松江府時連年水荒威下車加意賑卹民賴以生積雨  
後繕城垣建郡學及登雲橋樂育坊桂香桃浪諸亭傾  
圯一新延顧文僖清輯郡志甫從事而去郡猶貽詩趣  
成之

郭志

喻時字子乾內江人正德六年進士自監察御史出知松  
江倭警狎至時厲兵飭備督糧馬倖追逋賦甚峻又欲  
撤沿城民屋合郡騷動時移文請之得免夏稅修葺郡  
志延顧少詹清爲總裁而聘文學高企吳稷岳鏜蔣惠  
等編訂於水利役法尤詳焉

郭志

馬騃字世用夏縣人宏治九年進士爲兵科給事中馬端

肅文升見其諫草曰董賈未之或先也駢儀觀俊整孝  
宗默眷之會與時宰迂出爲淮安推官正德六年轉松  
江同知廉知富室以積逋累細民駢銳意清理輸納均  
平以外艱去人有說駢宜少貶損者正色曰窮通顯晦  
命也吾如命何

郭志

史瑄偃師人正德中以通判攝上海縣事澹泊寧靜不家  
於官後以憂去民常見思

上海志

黃希英字如英莆田人正德初進士七年繇上饒移知上  
海縣爲治不擾有寬仁長者之風

上海志

洪景德號艾溪正統甲子舉人授南昌府通判改松江惠



政甚多嘗濬吳松江新涇二萬二千丈鑿曹家河三萬餘丈華涇塘六磊塘等素湮塞者悉濬復之天順中擢

荊州府同知致仕

浙江通志

路迎字賓賜汶上人正德三年進士除南京兵部主事遷刑部郎中出知松江府松江俗尙師巫而困劫盜迎嚴督巡司保甲有擒賊至者賊證具折其兩足與衆共棄之巫覡持左道惑人令各舉首不舉卽以其罪坐之無少貸治行稱第一雅重博士王一鵬會擢陝西按察副使去翰林何良俊請得一鵬詩畫爲贈迎受而藏之累遷至兵部尙書卒年八十後董尙書其昌道經汶上造

其廬見所居不蔽風雨餽留談笑數幅而已

雲間志略  
參山東通

志

李充嗣字士修內江人登成化二十三年進士授戶部主事歷遷副都御史正德十三年巡撫應大宸濠之變帥兵扼采石遣別將守安慶留都恃以無恐尋加工部尚書修江南水利充嗣首濬白茅吳松二江以諸縣食利之厚薄爲編戶受役之多寡畫水道爲井地示以開鑿法戶占一區計工剋日先竟者賞後者罰人樂趨事復設巨筏數百曳木齒隨潮進退以汰沙土名曰濬川杷置小艇百餘繫鐵帚于尾以爲疏導于是潮汐不壅淫

雨不泛旱潦有恃其利甚溥嘉靖改元錄禦宸濠功加  
太子少保二年遷南京兵部尙書七年謝歸卒贈太子

太保諡康和

明史

吳廷舉字獻臣梧州人成化二十三年進士除順德知縣  
遷成都同知憂歸起補松江同知故事守升堂諸佐各  
歸署治事廷舉獨不去視守事有未當輒正言規切之  
用馬文升薦歷廣東僉事至戶部右侍郎遷右都御史  
巡撫應天諸府終南京工部尙書追諡清惠廷舉好薛  
瑄胡居仁學尊事陳獻章居湫隘亡郭外田而有書萬  
卷卒無以斂都御史姚鏌爲營辦之

明史參  
郭志

陳璠字汝玉温州衛指揮使正德六年奉敕擢金山衛都指揮僉事性孝友馭將校有禮下逮與隸未嘗笞辱之修建城垣樓櫓裁省金山衛七所投充軍士糧餉轉浙

江掌印都司

金山衛志

王卿字良佐太原人宏農衛籍正德九年進士授德平知縣十三年改知上海縣敦厚質實不爲赫赫名或干以私面賴直視不答武宗南巡諸邀索一不應第曰車駕至日供不供有令在何先擾爲寧藩反人心騷動卿許獲罪者以鐵贖大治兵刃示有備又愼改作三年無土木之役令出惟行行必期久縣有鬪長爲賦稅總儼黠

罔利卿盡除之令里甲自上於官歲杪有羨餘貯以賑

荒遷戶部主事

上海志

孫承祖平定人正德閒應例入太學授深州吏目以治河有功陞華亭縣丞嘗攝令事見賦繁獎冗振以嚴肅事

咸集改宜興丞

山西通志

譚璋桂林人以舉人授餘姚教諭正德十一年遷松江教授爲教寬而恕在官八年被讒解職嘉靖初臨海王度繼之有藻鑑隆慶閒饒平夏大勲亦以師範稱

郭志

聶豹字文蔚永豐人正德十三年進士十五年知華亭縣縣以頻年水災游饑豹至勞來安集發諸姦欺籍所侵

盜金萬六千用代逋賦濬塘港三萬丈有奇復塘之廢者萬二千丈民不苦水逃亡復業者三千餘戶始建名宦鄉賢祠增闢射圃又聘孫文簡承恩編輯舊志備一邑之史善譚理學時徐文貞階以諸生受知後豹入爲御史以按察副使罷歸階特疏薦召拜右僉都御史巡撫順天累遷兵部尙書以功加太子太保卒贈少保諡

貞襄

明史參雲  
開志略

鄭洛書字啟範莆田人正德十二年進士除上海知縣縣素稱難治洛書慈惠明敏凡訟聽自息有不息者召而折之以理平情而退日昃常垂簾屏坐進諸生論經史

較其文藝俗多火葬爲立義冢以習尙浮靡且婚無載  
書易速于訟乃品節爲式令社學師掌之遂建社學九  
十六區各建倉積穀準常平法以備賑論次鄉賢名宦  
營葺社稷壇墀更定邑志以賦法久弊議均田爲三則  
奏上未果行後巡撫林潤定爲三鄉本洛書議也洛書  
常謁府還見水次有沈尸壓以石磨密遣人偵之村中  
民家有石磨失其牡合之無異攝訊具服又舟行有焚  
尸道左者色甚恐詰之曰吾嫂也數日有以母亡不歸  
來告因逮前焚尸者鞫其人故無嫂乃告者之母飾金  
夜行被殺卽家發所劫金具在其攜發類如此嘉靖四

年徵爲監察御史遭父憂服闋還職給事中饒秀訐奏罷歸踰年卒年三十九後倭亂陷興化雒書子開來奔縣人朱察卿顧定芳醵金買田贍之表曰鄭賢侯田

明史

解一貫傳參雲  
閒志略上海志

章袞字汝明臨川人嘉靖二年進士選授御史督學南畿請託無所徇以議孔廟祀典謫建寧推官遷松江同知與諸生講學先德行而後文藝閒授大學中庸口義於傳註外多所發明累遷至陝西提學副使乞休不俟報

歸著有章子瑱言

郭志

何鼂字子魚順德人正德二年進士嘉靖初以監察御史



出知松江府清稅冊正糧役除機戶歲旱禱烈日中雨

應期至遷浙江按察副使終湖廣左布政使

廣東通志

方鈍字子鉅巴陵人正德十六年進士嘉靖初知華亭縣  
始至值歲饑勸民省費忍事其有訟至進之几案前以  
溫言解之郡守延客作長夜飲鈍俟其升席執爵以從  
還視事畢復之飲所祇候客不自安宴集遂疏鈍自奉  
儉約菜羹脫粟去官圖書外無長物歷遷戶部尙書

明史

孫應奎傳參  
雲間志略

程燦字文純南城人以舉人授景州學正分校浙江鄉試  
得鄭端簡曉爲解首母憂起復補曹州嘉靖七年遷松

江教授端方亮直嚴以訓士斥浮崇實習尙一變遷鹽城知縣先是譚教授璋寬厚得士心解職諸生泣送之至爝去勒石崇德堂尤去思不忘云

郭志

葉樸字淳夫貴溪人嘉靖八年以舉人署上海教諭諸生孫某有雋才爲蜚語所中學使者將黜之樸力白其誣事得寢又常捐俸以周貧士遷邵武知縣歷官知府後有周邦興者亦稱職云

上海志

陳禧字天佑莆田人正德二年舉人除松江府通判嘉靖八年奉檄治水東瀕海西瀕江中厯湖泖經營疏濬不避寒暑以勞致疾卒後海忠介瑞治吳松江多循其跡

云

五茸志逸

熊宇字元性長沙人正德十二年進士嘉靖八年以監察御史出知松江府爲治惇大輔以精明暇集諸生講明正學尤工吟詠有郡齋賞牡丹詩云正憶桑麻沾細雨更添珠玉對名花句人爭誦之

朔南通志參雲間志略

黃潤晉江人正德十六年進士除武進知縣入爲兵部主事嘉靖十五年由郎中出知松江府修葺學宮置田二百畝贍士疏請釐正祀典籩豆之數以宋李忠定綱生於華亭建議配祀陸宣公祠以八事定賦稅九事考里甲二事正均徭清操峻節當世重之父憂去官累遷至

參政著有經濟備考四十餘卷

郭志

許拱字宏莊南安人嘉靖中以貢授華亭訓導端軌正儀不嚴而肅與知府黃潤鄉里同學從諸寮旅見外未嘗私謁卽潤召之不往也著有易說學庸義

郭志

黃華遂寧人簡肅公珂子嘉靖十一年進士十九年知松江府蚤暮以更漏爲節漏止則出漏鳴則退同知李蓁通判張叔宣推官黃洪毗稱一時良吏皆嚴事華華每晨必與蓁等同升公座晝卯畢俾各還署視事卽封東西兩馬道及未申閒復聚郡堂問所施行其議可否有兩造聽訟邀僚佐或縣官共鞠之華端坐不發言靜觀

曲直刁猾無敢以游詞進士大夫亦無從干請也爲政  
僅五月聞母病乞致仕歸臨行惟來時敝篋不置鍵鎖

令吏民簡視始發留一琴而去後累官至光祿寺卿

郭志

張經字廷彝侯官人正德十二年進士除嘉興知縣嘉靖  
四年召爲吏科給事中歷遷兵部右侍郎總督兩廣軍  
務進尙書憂歸起南京戶部改兵部三十四年朝議以  
倭寇猖獗設總督大臣命經解部務總督江南北諸軍  
便宜行事十一月用兵科言改經右都御史兼兵部右  
侍郎專辦討賊時倭二萬餘據柘林川沙窪其黨方踵  
至經以瓦氏兵隸總兵俞大猷以東蘭那地南丹兵隸

遊擊鄒繼芳以歸順思恩東莞兵隸參將湯克寬分屯  
金山衛閩港乍浦犄角三面待永順保靖兵集爲搗巢  
計會侍郎趙文華以祭海至屢趣經進兵經守便宜不  
聽文華密疏經糜餉殃民畏賊失機帝怒下詔逮經方  
文華疏上保靖兵已至其日卽有石塘灣之捷五月倭  
突嘉興經遣參將盧鏜督保靖兵援以大猷所督永順  
兵由泖湖直趨平望克寬引舟師中路擊之合戰於王  
江涇斬首千九百餘級焚溺甚衆自軍興來戰功第一  
給事中李用敬等言王師大捷倭奪氣不宜易帥經至  
亦備陳進兵始末且言總督半載前後俘斬五千乞賜

原有帝皆不納論死繫獄十月與巡撫李天寵同棄西

市天下寃之隆慶初復原官謚襄愍

明史

楊宜字伯時衡水人嘉靖二年進士除雒縣知縣擢監察御史督學南畿取士重策論以觀通博試畢謁見問性理通鑑綱目有能條舉以對者輒旌異之士以此知務實學吳興茅坤令丹陽負文章重望宜考試必與偕故所甄拔如陸文定樹聲朱大韶袁福徵輩相繼登巍科衡鑒之精無出其右厯遷蘇松糧儲道南操江御史中丞南京戶部右侍郎代周忱總督備倭軍務倭據陶宅官軍無功事聞奪職

明史張經傳參雲間志略郭志

喬瑞霍州人嘉靖丙戌進士授西安府推官行取第一以  
王親例改松江同知檢勘水田通融錢法累擢山東參

政

山西通志

何繼之字善甫順德人嘉靖五年進士二十年知松江府  
時當災饑繼之發賑平糶安集流亡不遺餘力而自奉  
儉約臥敝榻服澣衣五年如一日嘗籍戶口覈版圖定  
三鄉均九則山場塗蕩周其廣袤涵旬窰隆悉其肥瘠  
不數月得首實隱田者數萬畝漏稅者數萬石然卒爲  
勢家鉅族所阻不得行入覲單車就道有富人持金追  
送峻拒勿納徐文貞階爲題楊震卻金圖以贈後遷河



南按察副使

雲間志略  
參通志

呂光洵字信卿新昌人嘉靖十一年進士歷知崇安溧陽  
召拜監察御史巡按蘇松等府蘇松澤國多水患後先  
塞治無成效光洵相度地勢疏濬醴渠有法水患以弭  
乃譜敘三江原委繪圖奏上賜金綺隆慶間巡撫海瑞  
濬吳松江猶祖其策洵又奏免旱租六十餘萬石用餘  
艘破海寇大洋中罷覆按陳牘省費無算再賜金綺增  
俸二級累遷至工部尙書

郭志

許鑰字北門錢塘人嘉靖二十年進士始知進賢縣務鋤  
强暴中忌者遂改松江教授至則屏置俗學以身教先

之曰士猶處女不女于閨而婦于室者無之又曰言佻而華本之先撥雖有才末矣士皆佩服之鑰內行甚修律已嚴潔一時學者稱爲孝廉先生厯漳巔二府佐終南京刑部郎中

郭志

張浩然字憶峯金山衛後所千戶掌青村所印時遇臺使按臨浩然郊迎役者官儲不備臺使怒欲辱之浩然乃手提二役四足去地尺許徐步以入擲階下臺使改容接之嘉靖十九年掌南漕所印擒倭五十七人厯柘林劉河俱有廉聲南倉軍儲大使費燬坐虧倉糧妻孥拘繫浩然罄囊以脫之後燬潛歸廣德無絲毫償不之校

也父軒年已老倭亂彌年郡縣多被蹂躪而金山衛獨

完軒守禦與有績焉

金山衛志

馮彬字用先雷州衛人嘉靖八年進士除上海知縣召拜  
監察御史二十五年出爲松江知府蠲苛細黜浮侈勤  
拊循務生養飭學校勸農桑省追呼嚴詭投常議徭賦  
里甲糧役及官布綿紗鹽課諸條規畫詳盡歲省公費  
數十萬稱廉能守以蜚語部議聽勘去士民惜之

雲間志略

參廣東

通志

劉存德字志仁同安人嘉靖十七年進士二十八年由監  
察御史出知松江府時苦旱六載逋賦至二百餘萬特

設參政主之存德拊循安卹請於使者寬期以俟秋成  
是歲大穰使者欲盡徵及額存德又請分兩載以紓民  
力其後浹歲豐稔遂補積逋十之五六乃築願豐堂于  
署後能詩善書好與儒士討論文藝而不忘民瘼厯官  
至按察使

郭志

任環字應乾潞安人嘉靖二十三年進士厯知黃平沙河  
滑縣遷蘇州同知倭患起長吏不嫻兵事環慷慨身任  
三十二年擊賊上海八團短兵接身被創幾殆宰夫徐  
佩捍環出死之己守太倉疽發背賊至裹瘡乘舟出海  
怒濤作操舟者失色環意氣彌厲竟敗賊俘斬百餘復

連戰陰沙寶山南沙皆捷擢按察僉事整飭蘇松兵備  
踰年賊犯蘇州城閉鄉民繞城號不得入環盡納之全  
活數萬計翼日敗賊于葑門又偕總兵俞大猷帥師援  
上海敗賊於習家墳二十四年又大敗賊於陸涇壩斬  
首六百級婁水爲赤又與遊擊曹克新敗賊於川沙三  
十五年又勝之於蔡家堡南滙所澱山其別部屯嘉定  
者火蕪之盡死論前後功進布政司參政兼按察副使  
蔭一子副千戶母憂奪哀晝出治戎夜歸衰絰賊有屯  
新場者環與都司李經等率永順保靖兵攻之中伏保  
靖土舍彭翹等戰歿停環俸賊平乞終制許之卒年四

十給事中徐師曾頌其功詔贈光祿寺卿再廕一子副  
千戶環在行間與士卒同寢食所得賜予悉分給之事  
急終夜露處或數日絕餐嘗書姓名於肢體間曰戰死  
分也先人遺體不可棄識之冀他日或得收葬將士感  
激所向有功

明史曹邦輔  
傳參郭志

鮑東萊任城衛指揮善騎射膂力過人破白蓮妖寇著名  
東土嘉靖三十三年率兵征倭于松江每出陳建一白  
旗所向摧陷後建紅旗與倭戰上海乘勝深入賊環擊  
之東萊及參將向允紹躍馬大呼曰吾輩受國恩當以  
死報復殺數十人矢盡遇害

山東  
通志

董邦政字克平陽信人以鄉貢授六合知縣善騎射常擒江中劇盜以勇敢果毅聞嘉靖三十二年擢按察僉事奉檄討倭駐節上海時新築城戰守未備賊蕭顯駕七巨艘潛泊城下穴民樓壁瞰城中虛實邦政登陴督戰所用神鎗手以一當百賊不支遁去三十四年擣川沙窪斬首五百級秋會兵合擊於吳林廟轉戰橫涇悉俘斬之爲趙文華所抑且有言周藩之死坐邦政督戰不力左遷蘇州同知三十五年與任環擊倭於界首進戰至西庵賊走匿法昌寺以火攻之殲焉又追擊新莊賊於沈莊敗賊於清水窪滅之論功加四品服俸引疾歸

當顯寇上海郴州劉本學以常州通判攝上海縣與邦  
政協力捍禦後萬厯間有馬平羅拱辰知松陽以禦倭  
功擢浙江僉事左遷松江海防同知駐上海建行署於  
城隍廟東增築敵樓三設施悉中窾要

雲間志略  
參上海志

劉尙義汾州人嘉靖乙未進士由行人擢御史立朝棱棱  
有威望尋謫判秦州知朝邑二十一年遷松江同知督  
糧餉不私其贏署府事革堂食費吏屬畏其介陞南京

刑部郎中

山西  
通志

方廉字以清浙江新城人嘉靖二十年進士授南康推官  
入爲禮部主事轉郎中三十四年東南有倭警帝御殿



廉襲出諫草以上徐文貞階時爲大宗伯異之言於吏部出知松江府廉知倭渡黃浦蹂躪上海卽增陴濬濠置敵臺宿甲士峙芻糧爲守禦計又用顧從禮議築上海城明年倭復犯上海以新城固不克轉攻府城廉曰夕纂嚴巡行城上親執夏楚儆其干掇之不力者許民團練鄉勇自爲戰投毒賊巢井中斃賊千餘人勢遂戢一日譌傳倭入西關民爭出走廉神色不變昇至鶴城書院事定第曰回府而已收養災黎在緡裸者雇民婦乳之存活不勝計遷江西副使歷右僉都御史巡撫應天疏請減賦百餘萬石蘇松居十之八爲言者論罷隆

慶初起南京大理寺卿轉工部右侍郎引疾歸卒年七

十

雲間志略  
參郭志

戈止字永清嘉善人嘉靖三十五年以貢授松江府教授課士嚴而有法清查學田隱占軫卹寒畯幼與徐文貞階同學及文貞秉政友好無間然絕不干以私文貞亟

稱之

浙江  
通志

韓崇福字君祉密雲人以選貢授滑縣知縣左遷松江府教授與郡縣士大夫交禮貌微不合浩然竟去諸生馳數百里追還之倭寇薄城崇福登陴分守有一酋跳躍諄詬崇福射殺之又連發三矢皆殪其魁賊引卻撫按

兩臺奇其才檄出浦守禦所統不數百人賊蜂至矢集如雨不爲動徐取矢還射之中者多落水斬馘數十擢通判遷蘇州同知同時有祥符郁文奎者善騎射亦嘗敗賊於南沙吳松江及葉謝寶山直指上其功陞俸一

級

雲間志略  
參郭志

陳璋字公獻光州人七歲舉奇童郡守令賦卿雲立就數千言嘉靖閒進士知景州遷太平同知量移松江值倭亂與蘇州同知任環訓練籌畫上禦倭策十二事切中機要統兵敗倭斬首數十級敘功以忤時相指入爲刑部郎中日事纂述有文集雜著九十六卷

郭志

湯克寬邳州衛人父慶平海寇王良有功克寬繼起父子  
稱驍將以蔭厯都指揮僉事擢浙江參將時濱海多被  
倭而將士無紀律議設大將統制江淮乃擢克寬副總  
兵駐金山衛三十三年倭突入吳松轉寇嘉定上海分  
掠蘇松克寬逆戰采陶港斬首八百餘級總督張經議  
擣賊柘林令克寬將廣西土兵屯乍浦與副將俞大猷  
相犄角大戰王江涇又圍之葉謝殲殆盡會趙文華  
劾經惑克寬言縱倭飽颺逮問久之起惠潮參將狼山  
副總兵署都督僉事廣東總兵官萬厯四年炒蠻入掠  
古北口克寬偕參將范宗儒出塞遇伏戰死

明史

曹邦輔字子忠定陶人嘉靖十一年進士歷知元城南和  
擢監察御史三十四年由浙江按察使拜右僉都御史  
巡撫應天時倭聚柘林其黨自紹興轉竄南京破溧水  
爲官軍所迫奔潁墅副總兵俞大猷副使任環數邀擊  
之而柘林餘賊進據陶宅勢將與之合邦輔督副使王  
崇古圍之僉事董邦政把總婁宇協勦賊走太湖追及  
之盡殲其衆侍郎趙文華欲攘其功邦輔捷書先至銜  
之旣與浙江巡撫胡宗憲攻陶宅賊兵潰文華奏邦輔  
避難擊易致師後期總督楊宜亦奏邦輔故違節制逮  
繫謫戍朔州隆慶初起左副都御史協理院事歷兵部

右侍郎轉左總督薊遼保定軍務召爲右都御史進南京戶部尙書致仕卒贈太子少保邦輔廉峻厯官四十年家無餘貲撫按奏其狀詔遣右評事劉叔龍爲營墳

墓

明史

劉東陽四川人上海縣丞嘉靖三十三年賊首蕭顯領千餘衆從太平寺竹家橋奄至市民潰散恣其劫掠糧艘泊浦上者悉被燒毀董邦政使東陽擊之挺身獨戰遂遇害賊又北自海口南自周浦連舸三百入寇鎮海衛指揮武尙文建平縣丞宋鼇奉檄統所部巷戰伏發尙文戰於西簍笠橋斷馬足死鼇力戰於縣橋死總督楊

宜巡撫曹邦輔巡按周如斗親臨其喪哭奠盡哀上海  
胡芳爲作武朱死事歌其時同陳亡者吳賢丁爵及士

民楊鈿竝祀羣忠祠

通志參  
據目鈔

吳賢杭州衛鎮撫統所部兵來禦賊屯黃泥浜與賊戰死  
於陳又有鳳陽義官丁爵與二子皆武健應募率二百  
人出哨遇賊趙家溝戒二子勿前舉鐵鞭連搥三賊一  
賊佯死爵抽刀下取其首被斫斷臂二子趨救負以所  
乘馬而還踰夕死

上海  
志

劉重光字伯明指揮使惠曾孫深諳韜略嘉靖三十一年  
武舉襲世職三十三年倭寇犯境奮勇爭先斬首數級

生擒一人賊畏而退撫按紀功選掌衛印操心若水軍

士莫不誠服

金山衛志

陳習蘇州衛鎮撫與婁宇共守南匯所習善標鎗部卒嫻其技者每用以破敵任環攻蔡廟堡及曹邦輔潁墅之捷習與有功焉

郭志

車梁福建人眇一目多機變倭亂詣軍門自效爲督府牙兵長使練鄉勇遇敵輒勝授百戶洊擢至遊擊嘗追賊至橫涇盡伏不見梁捫所殺人肉未寒搜莽中俘斬無遺類又從任環破滌關賊能與士卒同甘苦賞賜分給麾下有大將風料敵奇中後立功閩中官參將

郭志



韓璽以都司閒居嘉靖三十三年用張經薦帥師擊南涯  
賊焚其三艦逐北至白沙灣斬獲無算賊善飛躍難與  
陸戰勝於陸者此爲首功時有通泰參將解明道亦以  
應援至破賊於吳松爲克捷之始

郭志

曹克新四川遊擊將軍統川兵援松江攻川沙賊大敗之  
賊退走吳松克新復以舟師襲擊斬獲甚衆又於雪夜  
縱火搗周浦賊巢毀其營柵賊潰散卒至殄滅

郭志

楊尙英鎮海衛千戶虬髯燕領長七尺餘善射屬倭亂尙  
英戮力行閒大小數十戰積功遷蘇松參將嘉靖三十  
五年戰於吳松口逐北至海洋犁其舟十三俘斬二百

人後爲浙直副總兵

郭志

周如斗字允文餘姚人嘉靖二十六年進士除貴溪知縣徵拜監察御史三十三年巡按蘇松四郡下車會倭寇訐上海如斗具疏言賊勢猖獗歲復大旱得旨蠲常稅十之五慮客兵久駐騷擾地方選鄉勇給口糧訓習之以備緩急明年賊犯柘林募兵亦至度其勢必走蘇劄吳江兵堵截賊果退屯墓亭合圍俘馘甚衆又度寇松餘黨必由唐行鎮西竄擊勝之於婁門斬首四百餘級又合督府兵大捷於沈莊寇復據陶宅新場如斗駕小舟夜渡斜塘風烈幾覆又以歲旱奏減田租之半先後

督戰功亡慮數十而督師趙文華匿不聞僅賜白金文綺加俸一級而已尋視學南畿遷大理右寺丞四十一年擢右僉都御史巡撫應天省兵餉三之一停織造及帶徵逋賦晉副都御史巡撫江西卒於官

郭志參雲  
閩雜志

婁宇嘉靖中把總三十三年調守南匯所當殘破之餘收集散亡屢破走賊賊以此斂避三十五年賊犯南匯宇擊敗之又追賊於九團洋又從蘇參將周藩追賊於唐行論功歷官至參將

郭志參  
據目鈔

熊桴字元乘武昌人嘉靖二十九年進士除知太倉州三十二年島寇薄城五日夜御史劾桴不能斬擊當罷民

爲訟寃削秩仍領職明年寇復至桴以舟師逆擊斬首數百級遷蘇州同知晉按察僉事備兵蘇松寇橫江淮間會河朔荆襄兵大敗之賜白金文綺金山衛軍亂桴下令勿閉城門檄軍還衛遣通判往餉爲所執桴單車入衛誅首惡及將吏之助從者在吳十二年從將帥後大小三十餘戰斬獲一千四百有奇建崇明福山川沙柘林吳松五城濬楊林瓦浦虹江白茅四渠增田賦二千二百餘石擢雲南參政累官巡撫廣東都御史卒贈兵部右侍郎

金山衛志

吳時來字維修仙居人嘉靖三十一年進士授松江推官

倭據柘林知府方廉病時來攝府事募匠治佛郎機諸器習弩射矛藥屯之四郊爲聲援鄉民攜妻子趨城下悉縱入客兵驕悍以恩結其長令巡視約束弗戢縛治之總督張經移鎮境上親兵取人一練時來鞭之百經怒不爲動徐曰用兵安民也忍庇兵以殃民乎經愧而止三十四年賊猝至攻城驟雨城壞西南隅數丈時來以勁騎扼其衝急興版築三日城復完賊引去又議決震澤斷松林道出平望趨澱山前後夾擊斬首三千餘級溺水無算後王江涇沈莊之捷時來其首謀也擢刑科給事中與張翀董傳策同日劾嚴嵩下詔獄嚴鞫主

謀猷上謫戍橫州隆慶初召復故官終左都御史卒贈  
太子太保諡忠恪爲禮部郎中于孔兼所論奪諡

明史  
參雲

閩志  
略